

Pita'ma Anante (2)

Avonkre'nea Naneke

1 ¹Nagra Saimoni Pitana, Jisas Kraisi kazokzo eriza aposol ne'mo'na, ana miko tagrama hunakna huta Anumzama Jisas Kraisi tamagu'mavazi ne'mo'ma Anumzamofontema tazeri fatgoma nehia Nete'ma tamentintima nehazamotarega, ama avona kreneramue.

²Anumzamo'a asunku zama'areti'ene, rimpafu zanteti, Ranti Jisasi Kraisima kenka antahinkama hunana antahintahi zampina, asomu hunegante'na mago'ane hagenka mrerigahane.

Anumzamofompima hageno marerizamofo nanake

³Tagrama Jisasima kenima nehunkeno'a, Agri'a hankavemo mika zanku'ma Agri'ma avonesia avu'ava zampima upama hunazana neramie. Agri'a hanave masazama'ane, knare avu'avazama'a erisunegu, tagrira tagi hu'ne. ⁴E'i ama anazampi mareri agatereno, knarezantfa hu'nea huvempa kea huhampirante'ne, hu'negu tagranena, Agri'a avu'avazama'a nehuta, ama mopafi kefo tavesizamofu havizampintira agateregahune. ⁵E'ina hu'negu ama ana agafare tamentintimo'ma hage ra hanigura mago'ane hanavetita, knare tmavutmava nehutma, knare tamavutamavatetira, knare antahintahi eneritma, ⁶ana knare antahintahireti tamavufamofu avesizana kegva nehutma, tamavufamofu avesizama kegva huzanteti, knazama erita nevutma, knazama erino vuzantetira, Anumzamofu avu'avaza nehutma, ⁷Anumzamofu avu'avazantetira, neramafuna knare tamavutmava hunezmanteta ovesinte avesinte hiho. ⁸Tamagripima ama ana avu'avazama me'nesigeta hageta mrerisageno'a, e'i ana tamavutamavazamo'a eri amama haniana, Ranti Jisas Kraisima ketma antahitmama hunazazamo'a amnezanknara osugahianki, nena rga'a rentegahie. ⁹Hianagi iza'o e'inhau avu'avazama nosanimu'a, avua asu huge, avua afetera nonkeankino, koma Anumzamo'ma kumi'ama azeri agru huno atrente'neazankura agenekanie. ¹⁰E'ina hu'negu nenafugata, hakarezama hanafina, Anumzamo huhamprintanteno tagi hune hutma hanavetitma ketma antahitma nehutma, mani fatgo hiho. Na'ankure

tamagrama e'inahu tamavutamavama hanutma trakara osugahaze.

¹¹E'inahu kantema vnageno'a, Ranti Jisas Kraisi'ma taguvazi nemo'a, manivava kuma'amofu kafana anagi hagro hanigeta ufregahaze.

¹²E'ina hu'negu tamagra ana tamage nanekema antahita oti hanaveti'nazanagi, nagra huramagesa huvava hugahue. ¹³Nagrama kena antahina huana, ama mopafima kasefa hu'na mni'nenuna, nagra huramagesa huvava hanuana knare hu'ne. ¹⁴Na'ankure Ranti Jisas Kraisi'a nasamino ko naveri hu'neankina, ama mopafina zazakna omanigahue. ¹⁵E'i ana agafare hanavetina erizana eneruankita, nagrama fri'na vanugetma, anama huramagesa nehua kegura, tamagera okanigahaze.

¹⁶Na'ankure antahizane vahe'mo'zama nehazaza huta, tagra Ranti Jisas Kraisi'a esiazankura havigea nosune. Hianagi Mrerisa msa'ane mni'negeta tagra tavufinti ke'nona zanku neramasamune.

¹⁷Na'ankure Anumza Nafatimo Agra'a ra agi nemino, masa'a eriana nehuno, hanavenentake masa'afinti anage huno Jisasinkura hu'ne, ama'i Nagri Mofavre, navesinentena muse hunentoa Mofavre'ni'e hu'ne.

¹⁸Higeta tagra'a agonafima mni'nonkeno ana kea monafinti higeta antahi'none. (Mat 17:1-8, Mak 9:2-8, Luk 9:28-36) ¹⁹Ana higeta tagra kasanampa vahe'mozama hu'naza kea antahi amama nehuta tamentinti hu'none, e'ina hu'negu tamagra ana kemofona keni nehinkeno, zamagri kemo'a hanimpima tavimo remsa huno viankna nehina, nantera ofumo, Kraisi'a tamaguafinti remsa hugahie. (Nam-Ham 24:17, Rev-Huf 22:16) ²⁰Hianagi tamagrama antahiana'ma hanazana, magore huno avon tafepima me'nea kasnampa kea, kasnampa vahe'mo'za zmagra'a zmagesafintira kreonte'naze. ²¹Na'ankure vahe'mo'za zmagra'a zmavesite, ana kasnampa kea kreonte'naze. Hianagi Anumzamo'ma hu'neankea Ruotge Avamumo zmazeri otige'za krente'naze.

Havi kasnampa vahe'mofo naneke

2 ¹Hianagi havige kasnampa vahera, amu'nozmifinti oti'neankino, anahukna huno mago'a havige rempi hurami vahera amu'nontamifinti oti'za, zamagra fraki'za maka krunage hu'za, tamentinti azeri haviza hu'naku anara nehu'za, Ramo'ma miza sezmente'nemofona zamefi hu'nemi'za, tusi'a knaza zamagrazmi zmagofetu erintegahaze.

²Rama'a vahe'mo'za zmagra'a monkozamofu zmavesi'za nevaririsageno, anazanteku tamage kemofona huhaviza hunte'gahaze. ³Anama nehaza vahera maka zanku kezmanunu hu vaheki'za, havi kereti tamazeri savri hugahaze. Hianagi Anumzamo'a korapa zmazeri haviza hunaku krunage vahera huhampri zmante'neankino, anama zmazeri havizama haniazamo'a ne-e.

⁴Na'ankure ankeru vahe'mozama kumi'ma hazageno'a Anumzamo'a ozamatre'ne, hianagi zmasga huno teve kumapi zmatrege'za, haninentake

kerifi mni'ne'za, keagarema otisageno refkoma haniazanku avega ante'za mni'naze. ⁵Hianagi korapa knafi vahera, ozamatreno zmahe frivgarene. Hianagi fatgo avu'avazankuke kea huama nehia ne' Noanki 7ni'a naga'agi huno nozmaheno, kefo avu'avazama nehaza vahera, tusi'a ko tinu zmahe frivgarene. ⁶Hagi anahukna huno Agrama Sodom Komora vahe'ma tevereti'ma zmahe fanane hige'za, tanefa'ma samprenazazamo'a, mago avame'za me'nenno hutaveri huno, Anumzamofu avu'avama osnaza vahera zmahe fanane hugahie huno nehie. (Jen-Agf 19:24) ⁷Hanki kefo monko avu'avaza nehu'za, zamagra fatgo osu zamavuzmava nehazageno rimpagna hunezmantea fatgo nera Lotina, Anumzamofu agu'vazine. ⁸Na'ankure fatgo ne'moma zamagri amunompi mni'nenno, nezmageno nentahino nehige'za, kasege rutagre zmavuzmavama knane knanema nehazageno'a, rimpagna hutere hu'ne. (Jen-Agf 19:29) ⁹Hankino e'i Anumzamofu fatgo avu'avama nehaza vahema, zamagu'mavazi'nea kankamuna antahineankino, hazenke zampintira zmagu nevazino, havi zmavu'zmavama hanaza vahe'mo'za menintetira knazampi manime vu'za, vahe'ma refkoma huzmante knarera uhnatigahaze. ¹⁰Mago'a vahe'mo'za havi miza erigahaze, e'inahu vahe'mo'za zmaguamo'a otige'za, monko'za hu zmagesama nentahiza, tra kea kefenkami netre'za, ana vahe'mo'za zmavufga ra nehu'za, ugota ankeru vahema huhaviza huzankura korora nosaze. ¹¹Ana nehazanagi ankeromo'za, knare hu'za hanavenentake vahe mni'nazanagi, zamagra Ramofu avurera vahe'mofona refkoa hunozmantaze. ¹²Hianagi ana havige rempima huzami vahe'mo'za zgakfagna vaheki'za, zmazeri'za zmahe frisaza vahe fore hu'nazankino, zamagri zmaguzmagesamo zmazerino zmahe frigahie. Zamagra havizankuke nehu'za mago'zana ontahi'naze. Hianagi zamagri havi zmavuzmavazamo zmahe frigahie. ¹³Zamagra havi zmavuzmava nehazanki'za, mizama'a haviza erigahaze. Zamagrama zamagesama antahizana, musenkase huta aka tina zge ferupina negahune nehu'za, havi zmaguzmagesareti nezama kaganema nenazazamo'a, zamagraguke antahi zmavuzmava nehu'za, zmagazehu zmavuzamava hu'za nevazankino, ana zmavu'zamavamo'a, zmazeri haviza hugahie. ¹⁴Maka kna, zamagra rumofu a'ene, rumofu venema savrima huzankuke nentahiza, havi zamavu'zamavama huzana otre'za huvava nehu'za, zamagra mago'a vahe'mofona fru hu'za rezmatga nehazageno, zamagraguke antahi antahintahi zmimo'a avi'nete. Hianagi zamagra hazenkegu nehakaze! ¹⁵Zamagra fatgo kana atre'za hza negraze. Beori nemofo Balamu'ma havi avu'ava nehuno, miza erinaku avenesiaza hu'za fatgo osu kante nevaze. ¹⁶Hianagi donkimo keosu zgamo vahe'mofu zmageru aruno, Balamuna Beori nemofo neginagi avu'avazamofona azeri fatgo hu'ne. (Nam-Ham 22:1–24:25)

¹⁷E'inahu vahe'mo'za kampui tinkerimo taneankna nehu'za, hampomo korimpena retufeno viankna hu'za kankekanke nehazanki'no,

haninentake teve kumamo'a zmavega ante'ne. ¹⁸ Ana vahe'mo'za rankege nehu'za, havige ke zamireku zamavufga ra nehu'za, vahera zamazeri oti ke hu'za monko zamavuzmava nehu'za, maka zamagra zamavufarera monko zamavuzmava nehaze. Zamagra monko zamavuzmavamomo zamesizana notre'za, e'inhau zamavuzmava nehu'za zamentintimo hanave oti'nea vahera zamami'mi hu'za zamavazu nehaze. ¹⁹ Ana nehu'za, maka vahekura fru hutma manihio hu'za huvempa ke hunezmantazanagi, zamagra havi zamaguzmagesamomo kazokzo eri'za vahe mni'naze. Na'ankure vahe'mo'za nankna zamuzmama nehazazamomo kazokzo eri'za vahe mni'naze. ²⁰ Na'ankure zamagrama ama mopafi havi avu'avaza atre'za, Ranti, Taguvazi Ne'ma Jisas Kraisima ke'za antahiza hu'nesaza zama, ete atre'za koma mni'naza havi avu'avapima ufresu'za, ese'ma mni'naza havi avu'avara agatere'za, havizantfa hu'za manigahaze. ²¹ Na'ankure fatgo avu'avamomo kama ke'za antahizama osu'neza, ruotge kasegema rutragazasina knarezantfa hisine. ²² Nanknaza zamagriteria fore'ma hu'neana, knare antahizamomo tamage kemo'a anage hu'ne, ***kramo'a ete eno amu'ma atitreneana eme ne'negeno, afumo'a sese huno agruma hu'neana, ete atreno ome hapa negrie hu'ne.***

Ramo'ma esania zamomo naneke

3 ¹ Navesi neramantoa rone'nimota, ama'i anante avo kreneramuankita tamage antahizana eneritma, tamagera okanisazegu tamazeri hanaveti ke neramasamue. ² Anumzamomo ruotge kasnampa vahe'mo'zama hu'naza ke'mo'a, avufa'a fore hugahie. Ranti Taguvazi Ne'mo aposol vahepi huvazino tamasami'nia kasegea tamagera okaniho. ³ Hu'neanangi tamagrama ketma antahitma hanazana, vgama reknafina, tamage kema huhaviza hu vahe'mo'za, tamage kemofona huhaviza nehu'za, zamagra'a havi zmaguzmagesa nevaririza, ⁴ anage hugahaze, egahue huno Rantimimo'ma huvempama hu'neana, omeanki inazupa egahie? hu'za hugahaze. Korapa'ma mni'naza kva vahe'mo'za frizageno, ese agafa huno maka'zama troma hu'neazamo'a, zahera osuno anankante me'neaza huno me'ne. ⁵ Korapara Anumzamomo ke nehigeno mona fore nehigeno, tinke me'nefinti mopa eri fore hu'neazamomo kea zmage'nekanize. ⁶ Anantera ama mopafima me'nea zantamina, tusi'a tinu ahe fanane hu'ne. ⁷ Hianagi ama mopane monane henkama refkoma hanianknarera Agra tevenuti kre fanane hugahue, huno kea huntengeno me'ne. Hagi Anumzamomo avu'avama nosaza vahe'enena zmahe fnanene hugahie.

⁸ Hianagi navesi neramantoa ronanimota amazana tamagera okaniho, Ramofontera mago zge ferumo'a ltauseni'a zgekufugna higeno, ltauseni'a zgekafumo'a magoke zge ferukna hu'ne. ⁹ Ramo'a huvempama hu'nea kerera, mago'a vahe'mo'zama nentahizaza huno akoheno eri'zana

e'norie. Hagi akoheno kavega anteno mani'neni, mago'a vahe'mo'za fanane osnaze huno mni'ne. Hianagi maka vahe'mo'za zamagu'a rukrehe hnazegu zamavega anteno mni'ne.

Monane mopane fanane hania naneke

¹⁰Rantimoma esianknamo'a kumzafa vahe'mo'za ontasmi'za neazankna hanigeno, monafima me'neazamo'a ra ageru neruno fanane hanigeno, tusi'a amuhonentake tevemo makazama ama mopafi me'neazana tefanane hugahie.

¹¹E'inahu kante ana makazamo vgaregahianki, tamagra inankna hutma manigahze. Mani ruotge nehuta, Anumzamofa fatgo avu'avaza nehutma, mni'nenkeno anazana fore hino. ¹²Ananknama esie hanutma eriza enerinkeno, ame huno eno. Anankna zupa tevemo mona te fanane nehanigeno, makazana te mramra huno, te mekitrere hugahie. ¹³Hianagi Anumzamo'a ko huvempa huranteno kasefa monane mopane tro hanugeneno, fatgo avu'avazamo ke megahie hu'ne. E'i anazama fore hanigu avega ante'none.

¹⁴E'ina hu'negu ronenimota, tamagra anazama fore'ma hanigura avega ante'nazanki, tamagrattmia tamazeri agru hutma Anumzanena tamarimpa frune nemanita, hazenkezana omnena, keaga huramante'zana omnena, ananknagura avega anteta maniho. ¹⁵Anumzamo'ma akoheno tavega anteno mni'neazankura tamagera okaniho. Na'ankure Agra maka vahe zmahokeno zmagu vazinakure, nerafu Poli'enena ama anazankura Anumzamo'ma knare antahintahima aminereti kretamine. ¹⁶Ama anazankuma huno Polima maka avoma kre'nea avomofoma tagrama antahiana hu'zamo'a amuhu hu'ne. Mago'amo'za ana kemofo rempi hu'za ontahiza, mnifatgo nosaza vahe'mo'za, ana nanekea ru agu'agesa rukrehe hu'za neramasamize. Zamagra anahukna hu'za mago'a avontafepi kenena erirukrehe nehu'za, zamagra'a kanazana zmagufare erigonefize. ¹⁷Hagi ronenimote, e'inahuzana fore hugahie huna ko tamasami'noe! E'ina hanigeta havi vahe'mofo zamavuzmava'zamo tamavareno havi kante vuzankura kva hu'netma, traka huzankura oti hanavetiho. ¹⁸Hianagi Ranti Taguvazi Ne' Jisasi Kraisi asunkuzane, Agri antahintahi zampi hagea ra hiho. Menine henkanena, Agra'a hihamu msa'afi ra agi'a erivava hugahie. Tamage.